

EH: «Egungo markotik XXI. mendeko erronkei aurre egingo zaiela pentsatzea da irreala»

Euren proposamenak eztabaida dagokion lekuan kokatu duela deritzo Otegik

Mikel Jauregi / Donostia

Joan den larunbatean jakinarazitako proposamenak eragindako erreakzioak baloratu zituen atzo Euskal Herriarrok taldeak. EHren iritzian, batzuek irrealizat jo dutena «ez da inondik ere irreala». «Beste batzuek 25 urteotan egindakoa da irrealismo politikoa, autodeterminazioaren eta lurraldetasunaren inguruko markorik ez dugulako uneon Euskal Herrian», esan zuten.

ARNALDO OTEGİK eta Joseba Permachek, Donostian emandako prentsurrekoan, argi utzi nahi izan zuten irrealismo politikotik ez duela ezer beren «euskal demokraziarako proposamenak». «Egungo marko zatikatzailerekin Euskal Herriak XXI. mendeko erronkei aurre egin diezaiekela pentsatzea da irreala». Hala, mende berriari begira, Euskal Herriaren bi erronka nagusiak zein izanen diren ere mahairatu zuen Otegik, «globalizazio ekonomiko eta kulturala kontuan harturik: bata, kulturalki nola biziraungo duen nazio ezberdindu gisa; eta bestea, neoliberalismoak eragiten dituen arazoei nola aurre egin».

Proposamenak, eztabaida faltsuak gaudituz, «eztabaida politikoa bere lekuan» jarri duela uste du Otegik. «Euskal demokraziaren aldeko propo-



EDURNE KOCH

Euskal demokraziarako EHk eginiko proposamenak «irrealistik» ez duela ezer esan zuten Otegik eta Permachek.

samen zehatz bati buruz eztabaidatzera beharturik sentitu dira guztiak, eta hori positiboa da. Hori baita euskal gizarteak XXI. mendearen atarian eztabaidatu beharrekoa: zein egitura juridiko-politiko-administratiboa behar duen Euskal Herriak erronka horiei modu eraginkorrean erantzuteko. Lehen aldikoz, sei lurraldeetako gizon-emakumeok etorkizunari buruzko eztabaida gauzatzen ari gara».

Erreakzioak hizpide

Proposamena plazaratuta izandako erreakzioak baloratzean, positibotzat jo zuen

EHko eledunak «alderdi aber-tzaleek mamian adostasun mailak ikusi» izana. «Izan ere, mamiaren inguruan adostasun zenbait daudela esatean, autodeterminazioaz eta lurraldetasunaz ari dira. Alegia, marko politikoa berri horren aldeko apustua egiten dugula denok». Ostera, baztertu egin zuen EAJk eta EAK kritikaturako «irrealismo politikoa». Otegiren aburuz, EHren proposamena errealtatean guztiz sustraiturik dago. «Gure herriak eta euskal herritarrok ditugun arazoei aurre egiteko errealtate-tik abiatuta, behin betiko errealtate bilakatu behar

den euskal demokraziari zuzendutakoa da gure apustua». Bi estatuen jarrerak Madrilgo Kongresuan edo Parisko Asanblea Nazionalean komentzimenduz irabaz daitezkeela pentsatzea jo zuen irrealismo politikotzat.

Aldiz, PPko eta PSOEko ordezkari politikoei izandako erreakzioak «histeria kolektiboaren» baitan kokatu zituen. «Hori guztia zergatik? Euskaldunok bakean eta demokrazian bizi nahi dugulako, eta gure etorkizuna erabaki. Frankismotik oinordetzan hartutako eskema politikointelektualekin jarraitzen dute», gehitu zuen.

Alderdi eta eragile guztiei aurkeztuko die proposamena EHk

JOSEBA PERMACHEK atzoko agerraldian aurreratu zuenez, joan den astelehenean ekin zion EHk proposamenaren gizarteratze eta atxikimendu kanpainari; *Bai euskal demokraziari* lelopean jorratuko dute.

Alde biko bileren bitartez emanen die «Euskal Herriko eragile politiko, sozial eta sindikal guztiei» proposamen horren berri —atzo LABekin bildu zen—. «Eta eragile guztiak diogunean, RPR, UDF, PP, UPN, PSF eta abarrez ere ari gara», zehaztu zuen. «Proposamena ezaguturazteaz gain, gure asmoa da indar politiko bakoitzari adieraztea iritsi zaiola garaia bere proposamena mahai gainean jar dezan. Eta konstituzio espainiar edo frantsesa bada proposamena, azal dezatela».

Kanpaina honen helburua zein den ere eman zuen jakitera Permachek: «Euskal gizarteak ezagutzea zein den EHk mahairatutako proposamena euskal demokrazia lortzeko. Izan ere, egunotan espainiar agintariek irudikatu nahi izan dute geure proposamena independentziaren aldekoa legez. Euskal demokraziaren aldeko proposamen soila baino ez da, ordea».

Aurkezpen publikoak ere egingo ditu EHk: gaur eta bihar bitartean Hegoaldeko lau hiriburuetan (Gasteiz, gaur), eta urtarriaren amaiera bitarte herriz herri.

EAEko IU-EBko koordinatzaile izateko bere hautagaitza aurkeztu du Amaia Martinezek

■ *Egungo zuzendaritza koalizioko «aniztasuna» onartzeko gai ez dela dio*

Joseba Arruti / Bilbo

AMAIA MARTINEZ Euskal Autonomia Erkidegoko IU-EBko koordinatzaile izateko osatutako hautagaitza alternatiboa aurkeztu zuten atzo Bilbon. Kandidatura honek EPK Euskadiko Partidu Komunistako eta Ezkerraren Kemena korrante alternatiboko hainbat kideren sustengua jaso du. Guztira, 50 bat militantek adierazi diote beren atxikimendua Martinezi; eta, tartean, hautetsiak, Lehendakariatzako hiru kide

eta EAEko Kontseilu Politikoko kideak agertzen dira.

Iuko koordinatzaile kargurako hautagaiak azaldu zuenez, «egungo zuzendaritzak erakutsi du ez dela gauza koalizio barruan dagoen aniztasuna onartzeko». Ildo horretatik, V. asanblea has-teko 72 ordu falta ziren arte «integraziozko kandidatura bakarra lortu nahian aritu» direla nabarmendu zuen Ivan Alvarez EPK-ko idazkari nagusiak; datorren asteburuan egitekoa da batzarra, Leioako campusean. Haren

esanetan, «hori ezinezkoa izan da, Madrazoren zuzendaritzak konfrontazioa aurreratu duelako».

Martinez taldeak batzarretik aterako den zuzendaritza berria parekidea izateko eskatu zuen, «Iuko zeregin politiko eta exekutiboari begira guztiok erantzukizuneko betebeharrak hartuta». Euren iritziz, «Asanblean nagusitzea lortzen duenak ez du bozen %55etik gora jaso-ko, eta horregatik da beharrezkoa elkarlana».

Hautagaitza alternatiboak



MONIKA DEL VALLE

Amaia Martinez, atzoko aurkezpen agerraldian.

EAEko Iuk Estatuko Izquierda Unidarekin lotura federala eta solidarioa izateko eskatu zuen, «lotura konfederala baztertuta». Amaia Martine-

zek bat egin zuen Lehendakari-tza Federalak Lizarra-Garaziko Akordiotik alde egiteko ontzat emandako ebazpenarekin.